

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Home Minister Pu K. Sapdanga chuan nimin khan Lunglei Theiriata Mizoram Polytechnic Lunglei (MPL) hmunhma leh Pukpuia Mizoram Engineering College (MEC) tur hmun hmate tlawhin, an dinhmun a enfiah.
- 2. Mizoram chakkhai lakluhna kawngpui chhia in a nghawng, nitin mamawh leh bungraw hrang hrang harsatna chuan ziaawm lam a pan tawh a, ngai la awch chiah lo mah se Aizawlah chuan harsatna lian tham a awm lo.
- 3. Mizoram chhunga Jail hrang hrang te a tawt hle a, district jail tam zawkah chuan tang thei tur chin bituk aia tam an tang mek.
- 4. External Affairs Minister Dr S Jaishankar chuan nimin khan New Delhi-ah South Korea External Affairs Minister, Cho Hyun nen inkawmna hun an hmang.



HOME MINISTER

Home Minister Pu K. Sapdanga chuan nimin khan Lunglei Theiriata Mizoram Polytechnic Lunglei (MPL) hmunhma leh Pukpuia Mizoram Engineering College (MEC) tur hmun hmate tlawhin, an dinhmun a enfiah.

Minister Pu K. Sapdanga chuan MPL chu engineering lama mi thiam tak tak leh Mizoram inngahna thahnem tak chher chhuaktu, Mizorama technical institution upa ber leh pum pawimawh tak a nih angin a hlu hle tih sawiin, tuang tak leh tha taka zirna kalpui a nih theih nan sawrkarin theih tawp a chhuah tih sawiin, harsatna leh mamawh la awm - building thuam that leh thawktu indaih lohna puhrukna tur te pawh a tul anga ngaihtuah chhoh zel a nih tur thu a sawi a.

MPL Principal Er Lalnuntluanga chuan ram luah man chungchanga court thubuai vanga June ni 27-a MPL building eng emaw zat kalh chu sawrkar hma lalnain August ni 12-ah hawn a nih leh tawh thu leh class pawh pangngai taka kalpui a nih tawh thu sawiin, sawrkarin a ngaihsaknaah an lawm tak zet tih a sawi.

Minister hian Pukpuia Mizoram Engineering College tura sak chu a dinhmun enfiah bawkin MEC chu engineering zirna tur leh Mizoram hmasawnna atana zirna in pawimawh tur a nih avangin Chief Minister-in a duh ang ngeia kum 2026-2027 session-a tan hman a nih theih nan tha tak leh chak taka hna thawk turin department hotute leh thawm that ngai leh buaipui ngai hrang hranga mawhphurtute chu a chah a. Mamawh an neihte pawh sawrkara thlen zung zung turin a chah.

Mizoram Engineering College-ah hian building ding lai 8 - Academic Block, Administrative Block, Workshop/Laboratory, Library, Boys Hostel, Girls Hostel, Cafeteria leh Students Common Room te a awm a ni.

<><><>

SUPPLY

Mizoram chakkhai lakluhna kawngpui chhia in a nghawng, nitin mamawh leh bungraw hrang hrang harsatna chuan ziaawm lam a pan tawh a, ngai la aw h chiah lo mah se Aizawlah chuan harsatna lian tham a awm lo.

Akashvani Palai chuan nimin khan Aizawl khawpui dawrte a tlawh kual a, nitin eichawp dawr ten bungrua an nei tha leh tawh a, an duhthusam ang takin bungrua la thleng vek lo mah se ngai an aw h leh tan tawh a ni.

Kar hmasa khan kan palai chuan Aizawl khawpui dawr chungchang hi a lo zirchiang tawh a, nitin mamawh kawngah harsatna a tam hle, kar khat hnuah erawh ziaawm lam a pan tawh. Insakna bungrua pawh a thleng leh thei tawh a, mi thenkhatin a man to a Cement an hralh pawh nimin chuan a man pangngai in an hralh leh thei tawh a ni.

Tuialhthei chungchangah pawh harsatna a awm tawh rih lem lo a, khawpui lailia Filling Station te chuan a duh apiang tan an pe chhuak thei leh tawh. Aizawl bawrhsap Pu Lalhriatpuia'n dan loa petrol leh diesel zawrh khapna thupek a chhuah erawh chuan zawm a la hlawh lem lo a, kawng sirah langsar tak taka zuar hmuh tur an la awm a ni.

Eichawp leh mamawh dang a thlen that lai hian bawngnhnute harsatna erawh a la ziaawm thei lutuk rih lo thung. Akashvani Aizawl zawhna chhangin Bawngnhnute chikhat Verka Distributor Pu F. Lalrodinga chuan, kawng chhia vangin kalkawngah hun hman chhung a la rei a, chu chuan nghawng a la nei tih a sawi.

<><><>

ASF

Vawk pul hri African Swine Fever (ASF) vangin, kumin August ni 16 thleng khan vawk 7980 an thi tawh a, hrileng vanga suat vawk 3315 awm tawh bawkin, vawk thi zawng zawng hi 11295 an tling tawh a, chhungkaw 3000 chuangin vawk an chan tawh a ni.

AH&Vety department chhinchhiah danin, kuminah August 16 thlengin district pariat - Aizawl, Lunglei, Siaha, Champhai, Lawngtlai, Mamit, Khawzawl leh Hnahtthial district-ah te ASF vangin vawk hi a thi a, tunlai bikah chuan Lunglei, Champhai leh Khawzawl District te chu hrileng tuar nasa zual an ni.

Tun hnai khan Aizawl district bawrhsap Pu Lalhriatpuia chuan thupek chhuahin, Aizawl district-ah district páwn atangin vawk, vawksa leh vawksa atanga siam ei tur lak luh khap a nih thu a puang a. Aizawl Bawrhap chuan, vawk damlo rêng rêng talh leh hralh khap tlat a nih thu a tarlang a, Vawk damlo chu dah hran vat tur a ni a, vawk thi rêng rêng bawlhhlawh paihna hmunah leh luikawrah paih mai mai loh tur a ni. Vawk thite chu lei thûk takah disinfectant nen phûm tur a ni, a ti a; vawk thi awmna vawk-in leh a velte disinfect-a tihfai vek tur a nih thu a tarlang.

Aizawl DC chuan Vawk damlo leh thi a awmin AH&Vety department hotute hriattir turin mipui a hriattir a; Aizawl district-a khua leh khua emaw, veng leh veng emawa vawk inlakpawh tawn turte chu vawk hrisel tha chauh la tur leh vawk damlo, ASF kai nia rinhlelh awmna khua/veng atangin vawk lak luh leh lak chhuah khap tlat a nih thu a tarlang bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PRISON

Mizoram chhunga Jail hrang hrang te a tawt hle a, district jail tam zawkah chuan tang thei tur chin bituk aia tam an tang mek a ni.

Jail lian ber Central Jail, Aizawlah chuah tang 913 an awm mek a, tang thei zat mi 480 an ni thung. District Jail zingah Aizawl, Lunglei, Siaha, Champhai, Kolasib leh Serchhip district jail-ah te chuan tang thei tur zat bituk aia tam an tang vek a, hetih lai hian Lawngtlai leh Mamit district jail-ah te erawh chuan tang thei zat bituk aia tlem an tang thung a ni.

Prison Department Website tarlan dan chuan, Mizoram chhunga Jail hrang hrang 11- a tang awm thei zat chu mi 1496 an ni a, hetih lai hian tuna tang awm mek chu mi 1912 an ni thung. District jail zingah Saitual district jail, mi 58 awm theihna tura tih chu a taka hman a la ni lo thung.

<><><>

India and South Korea

External Affairs Minister Dr S Jaishankar chuan nimin khan New Delhi-ah South Korea External Affairs Minister, Cho Hyun nen inkawmna hun an hmang. Social media post-ah Dr Jaishankar chuan hruaitu pahnihte hian sumdawnna, thil siam chhuahna, tuiptui lam, leh mipui te inzawmna tha neih te bakah ram pahnihte thawhhona tihhmasawn tumna kawngah inbiakna hlawhtling tak an nei tih a sawi.

Sector thar chhuak zingah pawh remchang thar leh thawhhona an dap chhuak tih a sawi a, chung zingah chuan artificial intelligence, semiconductor, clean energy, leh defence te pawh a tel a ni. Minister chuan Indo-Pacific bial leh tunlai khawvel thil thleng mek chungchangah pawh ngaihdan an an sawi dun thu a sawia. Meeting-ah hian Dr Jaishankar chuan ram pahnihte inkara inzawmna thuk zawk leh inzawmna zau zawk neih theihna Special Strategic Partnership-in kum 10 tlin lawmna an hman avangin lawmthu a sawi bawk.

<><><>

Nagaland Governor

President Droupadi Murmu chuan Manipur Governor Ajay Kumar Bhalla chu Nagaland Governor atan ruat ani.

Rashtrapati Bhavan Communique chuan Nagaland Governor La. Ganesan a thih avangin,President chuan Ajay Kumar Bhalla chu Manipur state nena kawpin Nagaland Governor atan a ruat tih a sawi.

<><><>